



2019-yil 5-noyabr

## **«Bu xolis fikr emas». «O'zkiyosanoat» o'z faoliyati to'g'risida tarqalgan xabarga munosabat bildirdi**

«O'zkiyosanoat» AJ matbuot xizmati ijtimoiy tarmoqda tarqalgan, mahalliy ammosfos tarkibida fosfor miqdori belgilanganidek 46 foiz emas, 6 foizligi iddao qilingan xabar yuzasidan munosabat bildirdi.

«Ijtimoiy tarmoqdagi kanallarning birida «O'zkiyosanoat» aksiyadorlik jamiyati faoliyatiga daxldor masala yuzasidan xabar e'lon qilindi. Shu munosabat bilan «O'zkiyosanoat» aksiyadorlik jamiyati quyidagilarni ma'lum qiladi:

Avvalo xabarda bir qancha noaniqliklar mavjud ekanligini, muallif ta'kidlagan mahalliy ishlab chiqaruvchi haqida hech qanday ma'lumot yo'q ekanligini ta'kidlab o'tish joiz. Shunga qaramay, xabar so'ngida keltirilgan «Afsuski, «O'zkiyosanoat» mutasaddilari bilan bog'lanishning ham, fikrlarini olishning ham imkoni bo'lmadi» jumlasini sabab ushbu vaziyat jamiyatimiz tomonidan atroflicha o'rganildi.

«O'zkiyosanoat» aksiyadorlik jamiyati tizimidagi «Ammofos-Maksam» AJ ammosfos ishlab chiqaruvchi va uni iste'molchilarga yetkazib beruvchi yagona korxonasi hisoblanadi. «Navoiyazot» AJ, «Farg'onazot» AJ, «Elektroximzavod» AJ va sobiq «Qo'qon superfosfat zavodi» AJlarida oddiy superfosfat ishlab chiqariladi.

«Ammofos-Maksam» AJ tomonidan 2019 yilning yanvar oyidan boshlab hozirgi kungacha qadar jami 97 959 tonna fizik holda, 44 829 tonna sof holda ammosfos ishlab chiqarildi. Korxonasi ammosfos mahsulotini Ts 00203074-9-2018 talablari asosida ishlab chiqaradi. Ammosfos tarkibidagi fosfor oksidi miqdori  $46 \pm 1$  foiz, azot miqdori esa  $11 \pm 1$  foizni tashkil etadi.

2019 yilning yanvar-oktabr oylarida Birja savdolari orqali 75 262 tonna fizik holda ammosfos qishloq xo'jaligi mahsulotlarini yetishtiruvchilarga yetkazib berilgan bo'lsa, 7 528 tonna fizik holda ammosfos eksport qilindi.

Korxonasi tomonidan ishlab chiqarilayotgan mahsulotlar sifati doimiy ravishda, texnik nazorat bo'limi va akkreditatsiyalangan ilmiy tadqiqot kimyo-texnologiyasi laboratoriyasi tomonidan nazorat qilib boriladi.

Ijtimoiy tarmoqdagi xabarda havola qilingan, tarkibida 6 foiz fosfori bo'lgan ammosfos o'g'iti korxonasi tomonidan hech qachon ishlab chiqarilmaganligi, ishlab chiqarilayotgan va qishloq xo'jaligiga ortilayotgan har bir mineral o'g'it sifati qattiq nazorat ostida ekanligini alohida ta'kidlab o'tish lozim.

Quyidagi javdaldagi «Ammofos-Maksam» AJda ishlab chiqarilayotgan ammosfos hamda Qozog'iston

Respublikasida ishlab chiqarilayotgan ammosfos tarkibi to'g'risidagi ma'lumotlar keltirilgan:

<b>Ko'rsatkich nomi</b>	<b>“Ammofos-Maksam” AJ da ishlab chiqarilayotgan ammosfos</b>	<b>Qozog'iston Respublikasida ishlab chiqarilayotgan ammosfos</b>
O'zlashtiriladigan fosfatlar massa ulushi, %	46±1	46±1
Suvda eruvchan fosfatlarning massa ulushi, %	42,3	33,9
Al <sub>2</sub> O <sub>3</sub> va Fe <sub>2</sub> O <sub>3</sub> larning massa ulushi, %	1,2	3,8
F ning massa ulushi, % dan ko'p bo'lmagan	1,4	2,8
MgO ning massa ulushi, % dan ko'p bo'lmagan	0,4	1,9

2019 yilda korxonada faoliyati davomida mahalliy qishloq xo'jaligi mahsuloti yetishtiruvchilari hamda xorijiy hamkorlar (mijozlar) tomonidan ishlab chiqarayotgan mahsulotlar sifati bo'yicha da'vo va e'tirozlar kelib tushmagan.

Yuqoridagilarni inobatga olib, xabarda keltirilgan hamda tekshirilmagan ba'zi ma'lumotlarga oydinlik kiritishni lozim deb hisoblaymiz. Ya'ni xabarda «Afsuski, «O'z kimyosanoat» mutasaddilari bilan bog'lanishni ham, fikrlarini olishni ham imkoni bo'lmadi» deb ta'kidlangan. O'rganish natijasida «Ammofos-Maksam» AJga yoki «O'z kimyosanoat» AJga bu masala yuzasidan hech qanday yozma va og'zaki murojaat bo'lmagan. Shu o'rinda ta'kidlab o'tish joizki, «O'z kimyosanoat» aksiyadorlik jamiyati tizimida «Ishonch telefoni» xizmati yo'lga qo'yilgan bo'lib, tashkilot o'zining rasmiy veb-saytiga, feysbukda o'zining rasmiy sahifasiga hamda telegramda esa o'z rasmiy kanaliga ega.

Yuqorida sanab o'tilgan birorta vosita orqali fermerdan, jismoniy va yuridik shaxslardan xabarda keltirilgan masala yuzasidan hech qanday murojaat bo'lmagan. Shuningdek, ammosfos tarkibidagi fosfor miqdori 6 foiz ekanligini tasdiqlovchi ikkita joyda o'tkazilgan laboratoriya tekshiruv natijalari mavjudligi ta'kidlangan, lekin havola etilmagan. Bundan ko'rinib turibdiki, asoslanmagan va tekshirilmagan fikr xolis fikr bo'la olmaydi.

Buni tasdiqlash uchun respublika bo'ylab sentabr va oktabr oylarida barcha viloyat tumanlariga ortilgan 50 000 tonnadan ortiq (fizik holda) ammosfosni xolis laboratoriyalar va fermerlarni jalb qilgan holda tekshirishga «O'z kimyosanoat» AJ tayyor ekanligini bildirib o'tmoqchimiz.

Xulosa o'rnida aytish mumkinki, O'zbekiston Respublikasi qonunchiligiga muvofiq, asoslanmagan ma'lumotlarni tarqatish hamda ushbu ma'lumot orqali shaxs yoki tashkilotning sha'ni, qadr-qimmatini va ishchanlik obro'siga putur yetkazganlik uchun javobgarlikka tortilishi belgilangan», deyiladi «O'z kimyosanoat» AJ matbuot xizmati xabarida.

«O'z kimyosanoat» aksiyadorlik jamiyati ishonch telefoni: (78) 140-74-14

Manba: [Kun.uz](http://Kun.uz)

**source:**

"O'z kimyosanoat" aksiyadorlik jamiyati

<https://new.uzkimyosanoat.uz/oz/press/news/kunuz-ammofos>